

Planinarski savez Kantona Sarajevo upućuje protest zbog gradnje visokih brana u kanjonu Ljute

25 May 2013

Prema informacijama koje smo dobili od kolega iz planinarskih društava dana 18.05.2013. g. održana je izborna Skupština Planinarskog saveza Kantona Sarajevo. Od ukupno 16 članica ovog Saveza, Skupštini su prisustvovali delegati 13 planinarskih društava ovog kantona.

Nakon izlaganja i diskusije po tačkama dnevnog reda, pod tačkom "razno" javio se Dalvin Kadiraj, predsjednik Planinarskog društva "Željezničar" te informisao prisutne o netom izdatom rješenju Federalnog ministarstva okoliša i turizma kojim se daje okolinska (ekološka) saglasnost za gradnju triju visokih brana za hidroelektrane u kanjonu rijeke Ljute (Dindolke).

Tokom nastavka sjednice Kadiraj je predložio da Skupština uputi protest Federalnom ministarstvu okoliša i turizma zbog ovog skandaloznog postupka. Skupština je jednoglasno usvojila predloženi zaključak te naložila Upravnom odboru Saveza da provede zaključak, odnosno da uputi protestno pismo prema ministarstvu. Ono je posebno zanimljivo u ovom slučaju jeste činjenica da je ovaj zaključak podržao Mladen Rudež koji obavlja funkciju predsjedavajućeg Skupštine. Mladen Rudež je pomoćnik ministrice Federalnog ministarstva okoliša i turizma, odnosno voditelj Sektora za okolinske dozvole, a upravo je ovo tijelo provodilo spornu proceduru Procjene uticaja na okolinu i izdalo rješenje o izdavanju okolinske dozvole za gradnju visokih brana na Ljutoj.

Osnovni razlog zbog čega se brojne nevladine organizacije protive gradnji velikih brana u kanjonskom dijelu rijeke Ljute leži u činjenici da se radi o visoko vrijednom prirodnom području. Federalne vlasti su još 2005. godine donijele Odluku kojom se ovo područje posebnih prirodnih obilježja svrstava u područje od značaja za FBiH u cilju očuvanja bioloških, pejzažnih, hidroloških i geomorfoloških vrijednosti ovog područja i to sve do uspostavljanja planiranog Nacionalnog parka "Igman, Bjelašnica, Treskavica, Visočica". Za provođenje ove Odluke i očuvanje ovog prostora od devastacije zaduženo je upravo Ministarstvo okoliša i turizma. Međutim, umjesto da provodi donesene Odluke i da štiti interese građana Federacije BiH, ovo ministarstvo se ponaša upravo suprotno.